

# Vun driweriwer

erscheint auf [www.lenauheim.de](http://www.lenauheim.de)

monatliche  
Erscheinung

Mai 2015

von Helen Alba

## Die akkurate Kerweimädle

Mich un mei Schwester hat die Oma an der Kerwei angezoo. Do war in der vordri Stub, alles parat uf de Better ausgebreet. De Hansl, fünf Unerreck, de in Falte geleete Owerrock (des hat mer domols mit Zuckerwasser gemacht), es Halstiechl, Himit, Leiwl un Scherz. Mir han um fünf Uhr Morjets ufstehn misse, weil des hat gedauert, bis mer angezoo ware. De Owerrock is vore zugenäht un es Halstiechl vore uf der Bruscht iwer Kreiz geleet gin un die Zippe sin hinne ufm Buckl/Hinnre scheen iwer de Owerrock ausgebreet wore. Die geknippte Fransle han so akkurat leije misse, dass es ke Unteetl zu gsiehn gin hat. Un aach am Halstiechl, des uf der Bruscht mit eem Spingelsknopp zammghal gin is, is genäht un genodelt gin, dass es beim Tanze nit verritscht. Wann dann die Reih an die Scherz kumm is, dann han mer alli erleichtert ufgschnauft.

Mer muss mol zruckdenke, wie des frieher an der Kerwei war, wann e Großmädl nit nor eeni Tracht ghat hat (weil es ware jo Kerche-, Ausgangs- un Baaltrachte), oder wann in eener Familie gleich zwaa oder sogar meh Großmädle ware. Sie sin Sunntachs morjets in der Feschtracht zum Ufmarsch un Gottesdiensch, am Nohmittach in der Ausgangstracht um de Maiebaam un am Owet in der Baaltracht ufs Baal gang. Ich kann mich erinnre, wie mei Oma erzählt hat, wie se die Trachte in der Nacht beim Eellicht un mitm Kohlebiegleise zurechtgeleet hat for mei Tant, also ihre Tochter. Des war sicher e Mordsarweit, die mer sich heizutach schwer vorstelle kann.

Un die Anzieh-Prozedur han mer am Kerweisunntach zwaamol ausstehn misse. Weil, wann mer aus der Kerch kumm sin, hat die Oma uns ausgezoo, wieder alles scheen uf die Better geleet. Un noh em Mittachesse is vun vore anfang gin – weil beim Straussverletzetiere ware die Aue der Zuschauer noch schärfer. Ufm Baal hat unser Generazion dann schun in gewöhnlicher Kleidung, die awer nei hat sin misse, getanzt.

## Es gelehnti Halstiechl

Ich war drei Mol Kerweimädl. Erschtmols im Jahr 1966, wie die Bogaroscher Kerwei, die bis dann immer am erschte Sunntach noh Allerheiliche abghal gin is, vorverleet is wore. Uf de erschte Sunntach noh Maria Himmelfahrt, der Schutzpatronin unsrer Kerch, die 1774 ingeweiht is gin. Es war halt so, weil die Kerwei drei Täch gedauert hat, is mit Zustimmung vum Pharre bschloss gin, des Fescht in de Summerferien zu feire, weil dann alli Schiller un Studente derhem ware. Manchi Leit han zwar gekrummelt, dass in dere Zeit massehaft Arweit im Garte un ufm Feld is, doch zuguterletscht sin alli eenich gin. Es war ach es erschi Jahr noh em Zweite Weltkrieg, in dem die Kerweimädle in Tracht angezoo gin sin. Mei Tracht awer war nit vollständig, es Halstiechl, des in Bogarosch rosarot war, hat gfehlt.

Weil alles schnell hat misse gehn, war ke Zeit me, for e Halstiechl nei nähe un knippe zu losse. Weil ich jo im Lizeum vill Kumradinne aus anri Banater Derfer ghat han, han ich anfang mich umzuhorche. Un han Glick ghat. Es Susi aus Sacklas hat mer versprochen, es lehnt mer sei Halstiechl. Mitm Zug sin ich uf Sacklas gfahr un wie ich des Halstiechl vum Susi hemgebrung han, selmols hat mei Mutter verschrock gement: „Kind, des Halstiechl is doch bloo! Du werscht dermit absteche“! Zwar han ich des ach selmols bei dere Kerwei, doch ware die Stallierer sich eenich, dass se so e scheenes Halstiechl bisher nit gsiehn han.